



Broj: 01-319/23
Vareš, 28.12. 2023. godine

Na osnovu člana 8. stav 3.alineja 37. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09), te člana 22. Statuta Općine Vareš (broj: 01-162/12-prečišćeni tekst od 11.09.2012.godine), Općinsko vijeće Vareš na 31. sjednici održanoj dana 28.12. 2023.godine, d o n o s i:

O D L U K U

o osnivanju skloništa za napuštene pse na području općine Vareš

I. OPĆE ODREDBE

Član 1.

- (1) U cilju zaštite zdravlja i bezbjednosti građana kao i zaštite napuštenih i izgubljenih pasa osniva se sklonište za napuštene pse na području općine Vareš.

Član 2.

- (1) Općina Vareš osniva sklonište za napuštene pse na lokaciji kasarne „Hašim Spahić“ Zabrežje upisane u PL 450, K.O. Strica sa pripadajućim objektima i infrastrukturom, koje je dato na korištenje Općini Vareš na period od pet godina Odlukom Vlade FBiH V.broj: 1652/2023 od 15.11.2023.godine („Službene Novine FBiH“, broj: 90/23). Međusobna prava i obaveze utvrđena su ugovorom broj: 07-19-490/23 i 02-1960/23, između Službe za zajedničke poslove organa i tijela FBiH i Općine Vareš.

Član 3.

- (1) Poslove zbrinjavanja pasa u skloništu obavlja Služba za civilnu zaštitu Općine Vareš i JP Veterinarska stanica Vareš svako u okviru svog djelokruga djelatnosti.

Član 4.

- (1) Služba za civilnu zaštitu u okviru svoje djelatnosti izvršava sljedeće poslove:
- hvatanje i zbrinjavanje napuštenih pasa,
 - prevoz napuštenih pasa do skloništa,
 - vodi evidencije o broju pasa u skloništu,
 - vrši nabavku hrane za pse,
 - redovno snadbjevanje skloništa sa dovoljnom količinom vode (voda sa mjesnog vodovoda biti će korištena samo za napajanje pasa, dok će se voda za održavanje higijene objekta dopreмати po potrebi pomoću cisterni) ,

- održavanje zoohigijenskih i zootehničkih uslova u skloništu,
- fizičko obezbjeđenje u skloništu,
- organizuje medijsko promovisanje i vodi brigu o udomljavanju pasa.

Član 5.

- (1) Hvatanje i prevoz napuštenih pasa vrše obučeni zaposlenici odsjeka Službe za civilnu zaštitu uz primjenu odgovarajuće opreme i namjenskog vozila.
- (2) Poslove iz člana 4. ove Odluke JP Veterinarska stanica Vareš obavlja na način i postupcima propisanim Pravilnikom o osnivanju i uvjetima koje moraju ispunjavati higijenski servisi („Službeni glasnik BiH“, broj: 27/10).

Član 6.

- (1) JP Veterinarska stanica Vareš u okviru svoje redovne djelatnosti vrši sljedeće poslove:
 - vrši prijem i klinički pregled životinja u JP Veterinarskoj stanici Vareš,
 - provodi veterinarsko-zdravstvene mjere (identifikacija, vakcinacija, dehelmintizacija),
 - vodi evidenciju o primljenim životinjama na propisanim obrascima,
 - provodi veterinarsko-zdravstvene mjere u skloništu (sterilizacija, kastracija, identifikacija, vakcinacija, liječenje i dr.).

Član 7.

- (1) Osoblje koje je uključeno u rad skloništa mora biti osposobljeno za brigu o životinjama te ispunjavati uslove utvrđene članom 23. stav (3) Pravilnika o osnivanju i uslovima koje moraju ispunjavati skloništa za životinje („Službeni glasnik BiH“, broj: 27/10).
- (2) U skloništu mora biti odgovarajući broj osoba koje se brinu o životinjama, i to najmanje jedna osoba na 50 životinja.

Član 8.

- (1) Dopremanje i prijem životinja u sklonište, ishrana, njega, snadbjevanje skloništa pitkom vodom, održavanje reda i čistoće, održavanje zoohigijenskih i zootehničkih uslova u skloništu, fizičko obezbjeđenje skloništa, ulazak i izlazak ljudi, životinja i vozila, provođenje deratizacije, dezinfekcije i dezinfekcije, radno vrijeme, evidencija zapažanja o općem zdravstvenom stanju životinja, zdravstveni nadzor nad životinjama u skloništu, vođenje i sadržaj evidencije o životinjama u skloništu, postupanje sa bolesnim, neizlječivim, starim i opasnim životinjama, udomljavanje životinja, monitoring i nadzor rada skloništa te medijsko promovisanje, animiranje i edukacija građana po potrebi zaštite životinja uređuje se Pravilnikom o organizaciji rada skloništa i Veterinarsko- zdravstvenim redom.

Član 9.

- (1) Nakon stupanja na snagu ove Odluke, i dobivenim dozvolama za rad higijenskog servisa između Općine Vareš kao osnivača skloništa za napuštene pse i JP Veterinarske stanice Vareš zaključiti će se Ugovor kojim će se detaljno definisati međusobna prava i obaveze.
- (2) Stupanjem na snagu ove Odluke, Općina Vareš- Služba za prostorno uređenje će bez odlaganja započeti aktivnosti na pripremi potrebne projektne dokumentacije za rekonstrukciju navedenog objekta u svrhu azila za pse, kao i dozvole za formiranje skloništa , na osnovu uputstava koje propisuje nadležno ministarstvo a na prijedlog Ureda za veterinarstvo BiH.

II FINANSIRANJE SKLONIŠTA I HIGIJENSKOG SERVISIA

Član 10.

(1) Rad i funkcionisanje skloništa i higijenskog servisa finansira se iz:

- budžeta Općine Vareš,
- budžeta viših nivoa vlasti (kanton, federacija),
- donacija pravnih i fizičkih lica

III PROVOĐENJE I NADZOR

Član 11.

(1) Provođenje odredbi ove Odluke vrše Službe za upravu Općine Vareš, JP Veterinarska stanica Vareš, a inspekcijski nadzor veterinarska inspekcija, svako u okviru svoje nadležnosti.

IV PRIJELAZNE I ZAVRŠNE ODREDBE

Član 12.

- (1) Stupanjem na snagu ove Odluke, prestaje da važi Suglasnost kojim je Općinsko vijeće Vareš na 21.sjednici održanoj 29.11.2018.godine broj: 01-235/18 od 29.11.2018.godine da Općina Vareš može u cilju zaštite zdravlja i bezbjednosti građana kao i zaštite napuštenih i izgubljenih pasa osnovati privremeno sklonište za pse na lokalitetu „Kota“.
- (2) Općina Vareš će u saradnji sa JP Veterinarskom stanicom Vareš, u roku od 15 (petnaest) dana od dana stupanja na snagu ove Odluke donijeti Pravilnik o organizaciji i rada skloništa i Veterinarski zdravstveni red.
- (3) Do izmještaja pasa iz trenutnih objekata u registrovano sklonište, UG „Žučo“ će voditi brigu o psima, a nakon uspostave azila sudjelovati će u monitoringu i pomoći radu skloništa, što će biti regulisano posebnim Ugovorom sa međusobnim pravima i obavezama.

Član 13.

(1) Ova Odluka stupa na snagu osmog dana od dana objavljivanja na oglasnoj tabli Općine Vareš.

**PREDSJEDAVAJUĆA
OPĆINSKOG VIJEĆA**

Mahira Brkić

Odluka objavljena na oglasnoj tabli Općine Vareš 29.12. 2023. godine.

OPĆINSKI NAČELNIK

Zdravko Marošević

O b r a z l o ž e n j e

I. Pravni osnov za donošenje Odluke

Pravni osnov za donošenje Odluke o osnivanju skloništa za napuštene pse sadržan je u odredbama:

- (1) **Zakon o principima lokalne samouprave („Službene novine Federacije BiH“, broj: 49/06 i 51/09):** Jedinica lokalne samouprave ima vlastite nadležnosti ustanovljene ustavom i zakonom, i ima pravo baviti se pitanjima od lokalnog značaja koja nisu isključena iz njene nadležnosti, niti dodjeljena u nadležnost neke druge vlasti na osnovu ustava i zakona. U vlastite nadležnosti jedinice lokalne samouprave pored ostalog spada poduzimanje mjera za osiguranje higijene i zdravlja kao i zaštita životinja (član 8).
- (2) **Statut Općine Vareš (Prečišćeni tekst), broj: 01-162/12 od 11.09.2012. godine:** Općinsko vijeće u okviru svoje nadležnosti donosi odluke i druge opće akte kojima uređuje pitanja iz samoupravnog djelokruga Općine Vareš (član 22).
- (3) **Zakon o zaštiti i dobrobiti životinja („Službeni glasnik BiH“, broj:25/09):** Sklonište za životinje osniva fizičko ili pravno lice, jedinica lokalne samouprave, općina, grad, kanton ili entitet. Nadležni upravni organ kantona, grada ili općine izdaje dozvolu za formiranje skloništa za životinje, na osnovu uputstva koje propisuje nadležno ministarstvo, a na prijedlog Ureda, te vodi upisnik skloništa za životinje (član 28.stav 4 i 5).
Nadležni upravni organ kantona, grada ili općine izdaje dozvolu za formiranje higijenskog servisa za životinje na osnovu uputstva koje propisuje nadležno ministarstvo, a na prijedlog Ureda (član 29.stav 4).
Sklonište i higijenski servisi finansiraju se iz budžeta entiteta, kantona, gradova i općina te drugih vidova finansiranja (donacije, pokloni) (član 30).
- (4) **Pravilnik o osnivanju i uvjetima koje moraju ispunjavati skloništa za životinje („Službeni glasnik BiH“, broj: 27/10):** Upravna tijela sukladno odredbama Zakona o zaštiti i dobrobiti životinja („Službeni glasnik BiH“, broj: 25/09), prema posebnim uvjetima i potrebama sredine i brojnosti populacije napuštenih životinja, dužna su osnovati skloništa za životinje (član 3).
- (5) **Pravilnik o osnivanju i uvjetima koje moraju ispunjavati higijenski servisi („Službeni glasnik BiH“, broj: 27/10):** Upravni organi u skladu sa odredbama Zakona o zaštiti i dobrobiti životinja („Sl.glasnik BiH“, broj: 25/09), prema specifičnim uvjetima i potrebama sredine i brojnosti populacije napuštenih životinja dužni su osnovati higijenski servis za hvatanje i zbrinjavanje napuštenih životinja (član 3).
- (6) **Odluka o uslovima i načinu držanja pasa, te načinu postupanja sa napuštenim i izgubljenim psima na području općine Vareš broj:01-297/23 od 30.11.2023.godine** Sklonište za životinje i higijenski servis moraju se osnovati u roku od šest mjeseci od dana stupanja na snagu ove Odluke (član 33. stav 1).
- (7) **Odluka Vlade FBiH o davanju na privremeno korištenje kasarne „Hašim Spahić“ Zabrežje Općini Vareš (Službene novine FBiH broj: 90/23)-** kojom se daje Općini Vareš na privremeno korištenje na period od pet godina kasarna „Hašim Spahić“ Zabrežje i to zemljištu označenom kao: k.č. 769/3, 770, 771, 772, 773, 774/1, 775/1, 775/2 i 776, ukupne površine 34.223 m², upisane u PL 450, K.O. Strica sa pripadajućim objektima i infrastrukturom.

- (8) **Zakon o zaštiti i spašavanju ljudi i materijalnih dobara od prirodnih i drugih nesreća („Službene novine FBiH, broj: 39/03, 22/06 i 43/10):** U zaštiti i spašavanju ljudi i materijalnih dobara od opasnosti i posljedica prirodnih i drugih nesreća, provode se sljedeće djelatnosti i mjere u zaštiti i spašavanju: **zaštita i spašavanje životinja i namirnica životinjskog porijekla (član 48. stav 11).**

Zaštitu i spašavanje životinja i namirnica životinjskog porijekla mjera je koja se sastoji u: sklanjanju i premještanju; sprečavanju i lokaliziranju pojava parazitnih, zaraznih, i uzgojnih bolesti: nadzoru životinja, sirovina, proizvoda i otpadaka životinjskog porijekla; nadzoru ispravnosti stočne hrane i vode; ukazivanju prve veterinarske pomoći oboljeloj i ranjenoj stoci; uklanjanju leševa životinja i drugog otpada animalnog porijekla i poduzimanjem drugih odgovarajućih mjera (**član 92**).

Zaštitu, spašavanje i zbrinjavanje ugroženih, postradalih, oboljelih i zatrovanih životinja, kao i zaštitu i spašavanje namirnica životinjskog porijekla od opasnosti i posljedica drugih nesreća organizuju, usklađuju, a po potrebi sudjeluju službe zaštite i spašavanja koje su za to osposobljene, postrojbe civilne zaštite (**član 94**).

Postrojbe opće namjene organiziraju se, opremaju i obučavaju za izvršavanje zadataka na pružanju potpore u provedbi mjera prve medicinske pomoći, za gašenje početnih i manjih požara, zaštiti od poplava, spašavanju ugroženih iz ruševina, izgradnji skloništa i zaklona, provedbi mjera RKB zaštite, evakuaciji i zbrinjavanju ugroženih i stradalih, prijevozu i opskrbi osnovnim sredstvima za ishranu, smještaj i zdravlje ugroženog stanovništva, **te zaštitu životinja**. Postrojbe opće namjene osnivaju se općinama, a mogu se osnovati i u tijelima uprave, službama za upravu, ustanovama i pravnim osobama. Te postrojbe u općini osniva općinski načelnik, a u tijelima uprave i ustanovama i pravnim osobama, rukovoditelji tih organa, odnosno pravnih osoba (**član 129**).

II. Razlozi donošenja Odluke

Razlog za donošenje ove Odluke jeste potreba usklađivanja općinskih propisa sa odredbama Zakona o zaštiti i dobrobiti životinja BiH („Sl.glasnik BiH“, broj: 25/09), Pravilnika o utemeljivanju i uvjetima koje moraju ispunjavati higijenski servisi (Sl.glasnik BiH, broj: 27/10) i Pravilnika o osnivanju i uvjetima koje moraju ispunjavati skloništa za životinje („Sl.glasnik BiH, broj: 27/10), te Odluke o uslovima i načinu držanja pasa na području općine Vareš, broj: 01-297/23 od 30.11.2023.godine.

Radi tendencije Općine da implementira Zakon o zaštiti i dobrobiti životinja u potpunosti, te postojanja privremenog skloništa koje ne udovoljava minimalnim uvjetima iz Pravilnika koje moraju ispunjavati skloništa za životinje, pristupilo se iznalaženju adekvatnog modusa za smještaj pasa. Primarno, na osnovu Saglasnosti Općinskog vijeća broj: 01-235/18 od 29.11.2018.godine potencijalna lokacija je bila „Kota“, sa lijeve strane od ulaza na deponiju, na dijelu zemljišta označenog kao k.č. broj: 105475 k.o. Pogar. Međutim do sada se navedeno nije realiziralo radi izisikivanja značajnih finansijskih sredstava.

Kako su u posljednjih godinu dana učestali napadi pasa lualica na djecu i ostale građane, konstantna pojava novih pasa što rezultira ozbiljnim problemom na području naše općine a radi što hitnijeg izmještanja pasa sa trenutne lokacije, pristupilo se traženju i iznalaženju povoljnije lokacije za ovu namjenu.

Razlog promjene lokaliteta i proces osnivanja skloništa za pse na lokaciji kasarne Zabrežje, jesu bolji početni uslovi kojim se ispunjavaju minimalni uvjeti člana 9. Pravilnika o osnivanju skloništa, kojim je propisano da skloništa moraju biti na takvom mjestu da ne kontaminiraju

okoliš, te da su udaljena od naseljenog mjesta najmanje 250-300 metara, što je uvjet koji je u konkretnom slučaju zadovoljen, te minimalna početna ulaganja. Nakon definisane potencijalne lokacije, pristupilo se proceduralnom dijelu traženja od Vlade FBiH na korištenje vojnog objekta na period od 5 godina uz mogućnost produženja, što je Općina Vareš i dobila na korištenje Odlukom Vlade FBiH o davanju na privremeno korištenje kasarne „Hašim Spahić“ Zabrežje Općini Vareš (Sl.novine FBiH, broj: 90/23).

Osnivanjem skloništa za napuštene pse, radi smanjenja rizika od neizvjesnosti davanja na upravljanje drugim fizičkim i pravnim licima koja imaju registrovanu navedenu djelatnost za rad skloništa, kao i procedura osnivanja javne ustanove, i radi što manjih finansijskih ulaganja i adekvatne kontrole i rada skloništa shodno odredbi člana 28. stav 4. i 5. Zakona o zaštiti i dobrobiti životinja da sklonište može osnovati i općina, djelatnost rada skloništa povjeriti će se Službi za civilnu zaštitu, jer smještaj i zaštita životinja spadaju u jednu od mjera provođenja zaštite i spašavanja ljudi i materijalnih dobara od prirodnih i drugih nesreća.

Također, higijenski servis će obavljati djelatnost pri JP Veterinarska stanica Vareš jer je Općina osnivač a imaju prethodno registrovanu djelatnost za veterinarsku zaštitu životinja, što će se regulisati posebnim Ugovorom između Općine i Veterinarske stanice.

III. Finansijska sredstva za provođenje Odluke

Za rekonstrukciju potencijalnog objekta u namjenu azila za pse i finansiranje rada skloništa i higijenskog servisa potrebna su određena finansijska sredstva koja su planirana Budžetom za 2024.godinu. Da bi se riješila aktuelna problematika pasa lualica, prevenirala sigurnost i zdravlje građana predlaže se Općinskom vijeću da usvoji Prijedlog Odluke o osnivanju i organizaciji skloništa za napuštene pse na području općine Vareš.

PREDLAGAČ:

OPĆINSKI NAČELNIK

Zdravko Marošević